

Prix général

Ches tierres ed Chernunno

Edjo d'pus quiques énes, j'ai étampi ène erlacion espéciale acq ech racoin duqu'ej resse, ch's eud ed l'Oèse. H'est in coin qu'il est totalmint ercovert ed foéreuts, acq gramint d'intalles, ène bielle granne rivière pis étou ène feune egzepchionnelle. Ch'est quasi ch'racoin d'Picardie qu'il o ch'pus d'étindues verdes.

Ainsin j'ai bson d'd'aller sitant sovint qu'possible dins ches foéreuts obin à chol déjboque ed ches bos, padrière duqu'ej resse, à chol frontière inter ch'l'Ile-ed-France pus ches Heuts-d'France , inter Chol Capelle-in-Serva pis Fosses obin padlez chol « Borne Blanche », à Orry-la-Ville. Lo-vo, j'em pourlèque ed vir ches cherfs, ches biches pis ches dins. A mzure, timpe au matin ej sus tout émouvé d'elzes vir brouter chz'hierbes da ches camps intandis qu'tertin tertou i deurt coèr à mon d'echz umans. Quante ej ravise ches biètes ainsin, h'é comme si j'm'erloyoais à ch'monne animal.

J'ai bson étou d'd'aller à chz intalles ed Connelle, padlez Coye-La-Forêt, pou mi ertrouvoer chol perzinche do ieu, qu'al m'appourte ène douche forche rétuzlante pis rapurante, rin foqu'in l'erbayant. J'ai tanmint tcherre tcheurir alintour ed ches 4 intalles su ches cmins ombragés intandis qu'ej ravise, étéi, cho ieu, comme ipnoutisé per echz erflets d'ech solé su cho ieu. J'ai étou gramint tcherre echz intalles d'echl'abie ed Fontaine-Chaalys duqu'té pux in puque t'ertrouvoer à artcher su in tiot cmin d'tierre, à ch'mitant d'cho ieu, inter 2 intalles, comme à Connelles.

J'ai bson infin d'd'aller à Boran, su chu trottor, tout lonque el rivière Oèse. Al est pou mi comme ène veinne pis cho ieu qu'al carrie ch'est comme du sanque pou mi. Gambilonner in l'ravissant h'est étou ène espériinche ed comminnion.

Edpus dux ans stapindant, j'œuve in smanne à Francfort in Allmanne pis j'ertrouve l'Oèse foqu'à chol parfin d'euil smanne. J'ai ainsin aderché à warder in étchilibre inter emn ouvrage da des tierres horzinnes pis min bzon d'ête da mes tierres ed l'Oèse eq j'ai sitant tcherre. Quante j'ertrouve mes tierres oësiinnes, tous ches sanmdis, j'em réboule à raspirer, à vir, à intinne J'em réboule à vive.

A chu cminchmint d'2020, j'savoais point cmint lonmer ech loyin sapré qu'j'avoais asteur acq mes tierres ed l'Oèse. J'em ramintuve fort bin qu'j'ai croésé in grand cherf , ech 9 ed juhin 2020. O vénoait d'ête désinfreumé d'pus quiques jours pis j'povoais ertourner pou l'preume coep da mes coins préférés d'l'Oèse. J'étoais in route à tcheurir invier chu camp inter ch'l'Ile-ed-France pus ches Heuts-d'France , pi chol biète gaïante il o trécopé min cmin rondébilis acq 2 biches. J'savoais point qu'il étoit d'edvise ed chu Chernunno, ch'Diu chelte ed ches foéreuts à ch'momint-lo.

Chan qu'il est drole, ch'est qu'ch'est in étant élouégné d'l'Oèse, quiques moès pus tard, qu'ej d'alloais infin comprinne chan qu'i m'arrivoait acq mes tierres ed l'Oèse pis quièche qu'il étoit chu Chernunno eq j'avoais croésé ainsin in juhin.

In constinote, d'ech onze d'octobe à ch'treize ed novimbe ed 2020, nou poaiyi il étoait erbeyée per chu Robert Koch Institute (qu'ch'est ch'l'Institut pasteur allmand) comme in « coin » fort inplotché per ch'coronavrimeu. J'ai dévu ainsin dmoré blotché in Allmanne, da Francfort, pou mi povoir foaire emn ouvrage lo-vo, rapport qu'il étoait coèr in coep diffichile ed trécoper ches frontières acq el France, quasi comme pindant ch'preume trimesse. Adon, j'povoais mi pu foaire mz invo-derviins tous ches smannes inter l'Oèse pis Francfort.

I m'o follu gramint d'corage pou mi y dmorer , pindant in moès d'lon, sans m'fanmile bin seur mains étou sans amisses. Echz amisses eq j'ai à Frankfurt i voloaité mi pus m'vir, à coese qu'il avoaité freu d'rhabber ch'coronavrimeu, rapport q'ches françois il étoité fort inplotchés, Mains seurtoute, ha d'alloait t'ête durt pou miseute ed mi pus sintir pis d'mi pus vir au moinse in coep per smanne, mes racoins sitant ainmés d'ech seud ed l'Oèse.


Ainsin j'd'alloais m'ertrouvoer tout seu pindant chonq smannes. J'avoais freu foqu'd'ène coze : panitcher pis avoèr ène faim point résistibe d'ervénir da l'Oèse, maugré qu'ha séroait mi pu possible.

Asseuré, qu'in smanne, ha d'alloait t'ête fachile ed warder m'tiète otchupée rapport à mn'ouvrage qu'i m'prind gramint d'tan. Mains ha d'alloait t'ête pus compitché pindant ches wikintes pis j'd'alloais dévoir trouvoer des coses à foaire. J'ai à ch'momint-lo déchidé d'tout foaire pou mi m'otchuper pis point busier à l'Oèse. J'ai prind des cartes pis in djide ed Frankfurt pi j'ai ravisé chan qu'ej povoais foaire.

Dré ch'preume wiikinde, à ch'18 d'octobre 2020, j'ai prind min vélo ectrique eq j'avoais acaté quelques moès avant, pi j'ai déchidé d'aller démucher chz intalles eq j'avoais aperchu su GoogleMap.



Da Frankfurt, j'resse dins chol partie seud, da Niederrad, qu'al touque chol foéreut d'Frankfurt lomnée chol « Stadtwald », duqu'echz intalles qu'i leu trouvté. J'ai cminché per chu « Jacobiweiher », echl'intalle ed Jacob, à chonq tchilomèttes d'emn appartémint. Nn'in foaire el tour à piid rperzintoait foqu'2 tchilomèttes, mains pindant quelques mineutes, j'étoais comme da l'Oëse, à artcher obin à gambillonner alintour d'emz intalles oësiinnes. Min tchoeur i nn'in butchoait d'émouvure.



Pi j'ai continué à reuler in prindant ch'sin d'ech « Försterwiesenweiher », ch'l'intalle de Försterwiesen. Pi lo, à ch'mitant d'in piedsinte da chol foéreut, ch'grand cherf il o débutché pou l'preume coep pi il o trécopé rondibilis edvant mi pis chz'eutes gins qu'il étoaité lo. Ch'o 'té ch'preume chambutchage d'el journée.

Aprin m'avoèr ermis d'emz émouvures, j'ai prind chu cmin invier coèr ène eute intalle, ch'Kesselbruchweiher , echl'intalle ed Kesselbruch. Echte intalle-lo al arsoannoait coèr pus à chz intalles ed Connelle, da l'Oèse, mains in pus tiot.

Pi à ch'momint-lo, ch'Grand Cherf il o ervénu : j'ai peu l'ver, in route à tcheurir, da ches bos : il étoait grandessime acq ed bieux grands bos. J'ai jotché tout rade, j'ai tchitté tcherre min vélo pi j'ai traché d'prinne ène foto d'ech prinche ed ches foéreuts : j'y ai aderché. J'étoais pou ch'deuze coep d'chol journée butché per chl'émouvure. H'étoait chu deuze chambutchage d'em journée.



Ej voloais per apreu d'aller étou à chu Scherbelineweicher, echl'intalle ed Scherbelino qu'j'ai janmoais peu nn'in foaire el tour, rapport qu'il avoait ène barrière . Mains j'ai tcheu su bin miux qu'ho : j'ai rcroésé chu Grand Chef, in route à brouter dz hierbes acq in ho d'biches pis d'dins. J'ai rjotché, rtchitté tcherre min vélo pis j'm'ai bouté chte coep-chi à jnous su chol tierre : h'étoait quasi seur pou mi, qu'h'étoait chu « Chernunnos », in d'ches principals Dius dchu panthéo chelte, qu'il étoait lo, acq mi, pou li m'ayuder à indurer min tan tout seu à Francfort. Chu Chernunnos h'est in Dieu qu'i pourtège chol nature pi il étoait lo pou li m'pourtéger étou.



Ech wikinde d'après, ech sanmdi 24 octobre au matin ,j'ai bouté mes rhabillures d'esport pi j'ai déchiché d'aller tcheurir tout llonque eul fleuve « Main », qu'i trécope Frankfurt. J'ai tcheuru duqu'à chl' »quasi-ile » duqu'ech « Lilu Licht-und Luft Bad » qu'i s'trouve. Ch'est in ginre d'estaminet d'plage , si o vut. Il est ouvert dré qu'i cminche à foaire bieu à l'cour, pindant ches longs jours. O put y boère in coep obin s'y assir pi acater in quique séquoé à minger. Adon h'étoait freumé à tcheuze qu'os étoait in octobe. Ha m'o foait pinser à chol « Plage de Lys-Chantilly », padlez Boran/Oèse, duqu'ej tcheurs étou soint da l'Oèse.



A mzure, j'jotchoais, comme j'el foais à Boran, quant ej voéyoais in baquet passer su l>Main.

Adon j'el ravisoais avancher tout duchmint, su cho ieu, pis j'freumoais mes ziux, comme pou mi t'ête in molé dins l'Oèse.

J'ai toudis trouvoé chol rivière Oèse rapurante, comme ène amisse terde pis attincionnée. Acq el fleuve Mains, j'étoais asteur comme in route à m'achochonner acq ène eute granne rivière, in fleuve, drochi étou rapuré per es forche trintchille.



Pi l'lanman, ech dimanche 25 octobe per matin, i m'folloait étou ervir mn amisse nouvieu, rincontré chol smanne d'avant. J'ai erprind min vélo, pou mi d'aller ch'coep-chi vers chu grand intalle ed Waldsee, à 7 tchilomètes d'emn appartémint. Pi lo, à ch'derne tornant edvant d'arriver à chl'intalle ed Waldzee, j'ai rcroésé chu Chernunnos : comme avant, j'ai jotché, j'ai tchitté tcherre min vélo pi j'm'ai bouté à jnous

Ech wikinde d'après, ech sanmdi 21 octobe, j'voloais d'aller foaire in tour da ch'chinter-ville ed Francfort, pou mi raviser ches boutiques, manger lo-vo, pis d'aller dins in meusée. J'ai peu foaire tout ho, pi h'a 'té fort bin.

Mains chan qu'i m'o l'pus seurprind, ch'est qu'maugré qu'j'étoais in ville, j'ai rcroisé mn'amisse chu Chernunnos au moinse troès coeps.

Au preume, j'l'ai aperchu à l'adon qu'ej d'alloais foaire des commissions à ch'boutique ed min coron, da chole rue « Lyonner Strasse ». Il étoait lo, dsus in gaïant pannieu duqu'il étoait récrit « Platzhirsch gesucht ! », chan qu'i vut dire « O trache in cherf pou chte coin-chi », qu'ch'est ène expression allmanne qu'al vut dire « O trache in méneu » !

Asseuré qu'mi j'ervoëyoais lo coèr emn amisse chu Chernunnos, in route à m'foaire in clognon. Mains h'étoait point toute !!


Eul lanman, ech preume novimbe, j'ai ieu faim d'ertorner in ville, acq min vélo.

J'ai bin reulé 7 tchilomètes eudvant d'm'ertouvoer à ch'chinter-ville.


Pi intandis qu'j'étoais da chol rue « Weckmarkt », padlez chol « Dom St.Bartholomäus, », j'ai aperchu su ch'blanc mur d'ène batisse, in cherf acq ène croèx pa-dsus s'tête pis dux biches in dsous-li. J'enn'in rvénoais point : lo, à ch'mitant d'Francfort, in plein chinter-ville, chu Chernunnos il étoait coèr lo, comme pou mi m'aconduire da min démuchage à vélo d'chol ville.

J'enn'in brayoais lo étou d'émouvure.

Mains h'étoait pointe toute !!




A ch'coin d'chol minme rue, n'y avoait ch'musée d'chol caricature ed Frankfort pis dvant sn'entrée princhipale, n'y avoait in cherf, sifait sifait, in cherf, ch'coep-chi acq in capieu pi des biellés rhabillures. I sannoait qu'ch'étoait chol mastchotte d'ech musée. Per qué saint qu'h'étoait coèr in coep d'edvise ed chu Chernunnos, qu'il avoait prind chol forme d'in honme, chte coep-chi ?



Ech wikinde d'après, ches 7 pi 8 novimbe, chz émouvures il ont point décessé.
J'ai rallé foaire du vélo tout lonque el Main, mn'amisse eul fleuve, pou mi m'ermette d'em
smanne d'ouvrage pis pou mi y pucher cho énergie rinvitchante ed cho ieu.
Ches coleurs d'apréseut imbrasées per in solé for milant is bailloaité à ches rives d'ech Main
chol minme air eq ches bords ed l'Oèse.
Coèr in coep, j'étoais vraimint su min trottor comme à Boran.



J'ai 'té ch'coep-chi dusqu'à ch'l'Holbein Steg (passerelle de Holbein) duqu'il y avoait in grand
pannieu qu'i disoait « zurück in die Gegenwart » (ertour à ch'momint présint).
H'est lo qu'j'ai comprin étou qu'eul fleuve Main qu'i m'invoyoait in message fort simpe :
pourfite d'ête lo . Ches foéreuts, chz intalles pis ches rivières dins ch'seud ed l'Oèse obin dins
chol foéreut d'Francfort, ch'est l'minme cose : ch'est ches tierres ed chu Chernunnoz qu'il est
asteur tout partoute acq ti, dré qu'tu sros dins in indroit idintique.



J'ai défini per vidier Francfort ech 14 ed Novimbe 2021.

Mi qu'ej croéyoais qu'ej d'alloais y vive in mawais momint, j'y ai au contraile d'ho vetchu des momints fort intinches, qu'ej d'alloais janmoais oblier.

Chan qu'il o défini d'em convainque eq qui que cose d'estraordinaire i s'avoait passé inter mes tierres ed l'Oèse pis mes tierres ed Franfurt, h'est quant j'ai rtorné pou l'preume coep dpus quiques smanne à Sinlis, da l'Oèse.

In constinote, ech 16 ed novimbe ed 2020, in acoinduisant m'tiote à sn'école da Sinlis, il étoait lo, à m'attinne, à ch'mitant d'Sinlis : in Cherf gaïant, chu Chernunnos, su in rond-point erloyant chol « rue de la république » pis chl' »avenue du Maréchal Foch ».



Pou nn'in définir, chan qu'ej viins d'recrire h'est ène vraie histoère.

Ches fotos qu'j'ai bouté il ont vramint 'té prinses comme ej l'ai espitché da mn histoère.

J'ai démuché in 2020 chan qu'o lonme chz « erligions rchintrées su nos plannète tierre » (the Earth-centered religions) duqu'ech loyin acq ches bos, ches rivières, chz intalles, ches biètes il est essinchiel, il est sapré.

Ainsin, piot-à-piot, ech seud ed l'Oèse, acq tout chan qu'ej viins d'perzinter, il est dévnu ène tierre saprée, qu'j'ai bson d'sintir pis d'ver au moinse in coep per smanne.

Mains j'ai étou comprind qu'mes tierres ed l'Oèse is sont tout partoute duqu'il y o des foéreuts, dz intalles, des rivières, pis chol feune ed ches bos.

Mn église à mi asteur ch'est ches foéreuts pis ches bos d'ech seud ed l'Oèse obin d'ech seud ed Francfort, mn ieu bénite à mi ch'est cho ieu d'el Oèse pis d'ech Main mains étou d'echz intalles ed Connelle , d'Fontaine-Chaalis, d'Jacobiweiher obin d' Försterwiesenweiher, mz anges pis mes sants à mi asteur ch'est ches biètes ed ches bos isariinnes pis francfortoëses, min dieu à mi asteur, ch'est chu Chernunnos, ch'diu chelte ed ches foéreuts.

Vocabulaire / Vogabulaire

Picard	Français
A mzure	Des fois, parfois
Abie	Abbaye
Achochonner	Se lier d'amitié
Aconduire	Accompagner
Appourte	Apporte
Blotché	Bloqué
Bos	Bois
Chambutchage	Choc
Cherf	Cerf
Clognon	Clin d'œil
Coin	Région
Comminion	Communion
Croésé	Croisé
Déboque ed ches bos	Orée des bois
Débutché	Débusqué
Démuchage	Découverte
Deurt	Dort
Din	Daim
djide	Guide
egzepchionnelle	Exceptionnelle
Elouégné	Eloigné
Emouvé	Emu
Emouvure	Emotion
Erbayant	Regardant
Ercovert	Recouvert
Erflet	Reflet
Erlacion	Relation
Erloyoais	Reliait
Etchilibé	Equilibre
Etéi	Sous l'emprise de
Etoiat d'edvise ed	S'agissait de
Feune	Faune
Foéreut	Forêt
Gambilonner	Faire du footing
Grandessime	Grandiose
Granne	Grande
Hierbes	Herbes
Inplotché	Infecté, contaminé
Intalle	Etang

Invier	Vers
Ipnoutizé	Hypnotisé
Jnou	Genou
Loyin	Lien
Oèsiinne	De l'Oise
Perzinche	Présence
piedsinte	Sentier
Pourlèque	Régale
racoin	Recoin
Rapurante	Rassurante, calmante
Réboule à	Remets à
Rétuzlante	Rassurante, calmante
Rhabillures d'esport	Tenue de sport
Rinvitchante	Re vigorante, qui ramène à la vie
Rjotché	Arrêté de nouveau
Rondébilis	A vive allure
Rperzintoait	Représentait
Rtchitté	Laissé de nouveau
Sapré	Sacré
Tcherre	Tomber
Tcherthyinnes	Chrétien nes
Tcheu	Tombé
Tcheurir	Courir
Tchitté	Laissé
Trottor	Chemin de halage
Umans	Humains
veinne	Veine
Warder	Garder